

莊

簡

集

三

欽定四庫全書

莊簡集卷六

宋 李光 撰

五言絕句

次韻奉酬當時參議見贈遊鍾山五詩

二水蒼茫外千峯杳靄間傷心金碧地舉目異河山
英雄參上幕英氣蓋羣雄憤世仍憂國都忘酒醖中
六國衣冠盛中原氣象存腰間佩金印莫忘殺王敦
雅志希三金平生擅一丘歸尋赤松約何必更封留

塞北烟塵息江南勝氣多君王總戎旅來繼大風歌

跋六無詩卷後

六無信筆成無令浪流傳它時達官知人人願南遷

脩仁道中微雨峭寒荒山古道間桃花盛開因

偶成小詩

古道逢元夕荒山慘暮烟桃花雖作意未是豔陽天

時正

四月十四日

丁丑歲冬夜發家書二首

一別關山隔相逢未有期書來知勿藥歡喜偶成詩
越國今安在湖邊想舊居衡陽空有鴈不寄一行書

七言絕句

三月六日間五馬同郡僚出郊勸農

遙聞鼓吹出城闌露冕褰帷意在民父老莫疑頻駐馬
使君那顧採桑人

旋移瑤席盍朋簪日暮行庖簇柳陰力勸耕農頒漢詔
應知聖主愛民心

病中作

一枕昏昏若醉鄉
雲收霧散月臨牕
幽人睡足自驚覺
雲在青天月在床

池外紅蕉

雨後芭蕉粲曉霞
近如相妬遠如誇
臨池似把菱花照
隔葉深將翠幔遮

立夏日納涼

茅菴西畔小池東
烏鵲藏身柳影中
沙岸山坡無野店

不知此處有清風

五月八日雨大作聞守倅遊湖以前日白蓮見
寄戲成小詩謝之

守倅風流好事同笙歌都在雨聲中似知坐上多狂客
不許佳人酒面紅

老欽闔黎以政和七年九月十七日夜圓寂跌
坐如生道俗歎仰邑丞向仁叔作偈讚悼因次

其韻

鍊得金剛一性堅形如枯木尚凝然莫疑台嶺慈燈息
薪盡何妨火自傳

老人端悟上乘禪夜壑藏舟已脫然認得本來無一物
不將三觀浪流傳

寄天童覺老

竹牖茅簷屋數間不貪杯酒不遊山征租納罷秋田熟
未必天童似我閒

贈趙與楨

歲歲天寒白鶴來
篋中舊藁為君開
漁伊一脈微如綫
刀踐精思漸可回

竹几

虛滑輕涼任自然
水邊林下最相便
他年若遇青城吏

成壞方知盡屬天

青城吏見
費孝先事

洞下宗風冷秋初地而近時了覺二老化行淮
甸今復盛于閩浙學徒常千餘人予固疑之昨
天童訪予于五松山交臂立談之頃疑情頓釋

鏡定四庫全書
卷六
因成偈四句奉呈大衆一笑可也

一條枯木如青蓋古廟香爐散紫煙
百鳥却銜花作供
恁時方會祖師禪

雙雁道中

晚潮落盡水涓涓
柳老秧齊過禁煙
十里人家鷄犬靜
竹扉斜掩護蠶眠

送春

層樓極目送春回
愁裏匆匆把一杯
更有明年尋舊約

先驅還到北枝梅

羣花落盡柳綿飛
陌上遊人去漸稀
今日江津送春去
明年還向柳梢歸

友人惠鵝僕方戒殺贈二小詩還之

曉隨蘆鴈聚寒汀
只有崇師畫得成
欲付庖人應未忍
憐渠豈是不能鳴

右軍池上動成羣
何事羈棲傍主人
放汝江湖須遠去
莫隨鷄鶩惱比隣

留春

紅蕉開盡槿花飛
載酒登臨到落暉
秉燭更期尋勝侶
不教容易放春歸

白蓮

白色蓮花也自奇
亭亭水面半開時
恰如西子新粧了
未把胭脂污玉肌

跋胡機宜畫卷

吳山越嶠對橫斜
清夢時時到外沙
行過小橋墟落靜

定知深處是吾家

戲成寄介然先輩

鳴鳩隔屋報新晴
小閣幽牕分外明
怪底女僮來滌硯
無人知是和詩成

政和戊戌孟夏補試文武遣興一首

一簾疎雨鎖牢愁
小閣幽軒得暫留
漫說金甌能破睡
不如玉局解消憂

新橋

賈客船回泊暮潮夜涼乘月卧吹簫兩堤更擬栽垂柳
掩映荆溪菴畫橋

浯溪

結屋浯溪最上頭水輪灩灩水悠悠夜深燕坐觀心境
月到中天江自流

自象登舟入武僊縣境有山聳拔四十丈奇秀
異常有道人於此昇僊因以得名

青山萬疊俯連漪時有幽花掛石衣百里清溪休蕩槩

要看倒影入牕扉

陽朔道中兩絕

北客多誇陽朔山今朝了了見層巒
定知萬壑千岩勝不似山陰道上看

萬里南行豈偶然黃梁一枕夢邯鄲
初無惠政蘇疲俗父老休迎舊長官

覽義叟秋香二首詞情悽惋使人感嘆
義叟新有閨房之戚因戲續其韻且知予感念故人不

忘之意

小詩清絕與招魂香霧依然濕鬢雲一夜狂風都掃盡

鼻端無復麝餘芬

維摩經云如入落
菊林不麝餘香

冷艷孤芳孰與儔
此花飄盡更非秋
嶺頭賴有寒梅在
接續幽香入品流

次韻補之藥名十絕

前五絕自謂
後五絕寄贈

一樽聊對菊花前
獨上危樓晚景天
風外笛聲聞續斷
海桐搖落夜敲磚

娑娑終日步蓮塘
雲點空青月到廊
病渴長卿初賦就
伏神東壁漏聲長

平昔雌黃憫聖丘
預知鈎吻卒難收
狼牙狗舌須防已
擬向前湖覓敗舟

百部披尋手不停
腸留藁本味精英
林泉甘遂高良性
石斛何如五斗輕

堦前一葉巧隨風
夜半金莖沆瀣濃
白兔西飛如赤箭
烏頭旋復向龍鍾

面壁潛心學大空
此身無患任飄蓬
草堂自得醍醐味
更訪稽山支遁翁

山城衢陌厭塵泥
獨掃雲房價不低
早晚天門自開闔
不須鷄舌決明啼

纔過天社又中秋
江子何時寫我憂
風掃半天河海淨
玄霜著物蛻蟬休

草堂誰緝敗蒲編
笑傲松蘿不記年
應喜秋來甘澤瀉
牽牛時復自蹊田